

COMMUNICAZIUN A LAS MEDIAS

Poschiavo, ils 8 d'avrigl 2026

Resultat annual 2025

Repower cuntanscha danovamain in fitg bun resultat annual

Repower ha realisà l'onn da gestiun 2025 in resultat operativ (EBIT) da 133 milliuns francs ed in gudogn da la grupp da 101 milliuns francs. La pli gronda contribuziun al resultat deriva da la fatschenta internaziunala da commerzi cun energia. Repower ha generà in'auta valorisaziun regiunala grazia als tschains d'aua, a las incumbensas da lavur, a las taglias ed a las var 466 personas che han ina piazza da lavur en il Grischun. La gronda activitad d'investiziun per modernisar la forza idraulica grischuna è vegnida realisada a moda consequenta. La produenziun d'electricitad en las ovras idraulicas grischunas è restada sut la media pervi da las quantitads d'aua pli bassas.

Repower dispona vinavant d'ina chapitalisaziun solida e d'ina buna resistenza operativa. Uschia po l'interpresa perseguir vinavant sia strategia ed investir en in provediment d'energia segir e modern. Cun in EBIT da 133 miu. francs è il resultat da l'onn da gestiun 2025 sur la media da blers onns. Il gudogn da la grupp munta a 101 miu. francs e la quota da l'agen chapital è s'augmentada sin 59 pertschient.

La disponibilitad da l'infrastructura da la rait ha cuntanschì il 2025 ina valor remartgaba da 99,998 pertschient. Quai vul dir ch'ina clienta u in client da Repower ha stuì renunziar en media sulettamain durant stgars 13 minutas ad electricitad. Cun 9,6 rp. per ura kilowatt è il pretsch d'energia da Repower tranter ils pli bass da la Svizra. Considerond tut las cumponentas dal pretsch, è il pretsch da l'electricitad en il provediment da basa levamain pli aut ch'il median svizzer. Quai ha da far cun ils custs da la rait ch'èn pli auts pervia da la spessezza pli pitschna da la populaziun e la topografia pretensiusa en il territori da muntogna. Il provediment succeda vinavant cun electricitad indigena e regenerabla da las ovras idraulicas grischunas.

Ina produenziun annuala da 2'147 uras gigawatt

En total ha Repower produci l'onn 2025 2'147 uras gigawatt forza electrica. S'enter ina marschauna modesta la primavaira è era las precipitaziuns restadas sut la media en il decurs da l'onn. Quai ha già consequenzas considerablas per la produenziun da las ovras idraulicas.

Grazia a las investiziuns consequentas en la fotovoltaica è s'augmentada vinavant fermamain la produenziun dals implants solars. Ils parcs da vent en l'Italia ed en la Germania han percuenter registrà in lev regress sin fundament da las cundiziuns da l'aura. L'ovra electrica cumbinada cun gas Teverola è stada disponibla sulettamain a moda restrenschida pervi d'ina interrupziun pli lunga ed ha produci perquai considerablmain pli pauc ch'ils onns precedents.

La gronda part da la producziun d'electricitad da Repower è derivada er il 2025 da la forza idraulica (56 pertschient). En l'entir mix d'electricitad è creschida la part da l'energia nucleara, perquai che Repower ha augmentà per il 1. da schaner 2025 sia partecipaziun a l'ENAG (Energiefinanzierungs AG). L'ENAG sa segirescha l'energia da l'EDF (Electricité de France) e presta uschia ina contribuziun impurtanta a la segirezza dal provediment en Svizra.

Modernisar la forza idraulica dal Grischun

L'onn da gestiun 2025 ha Repower investì en tut 142 miu. francs. En vista al basegn d'energia creschent èn l'amplificaziun ed il mantegniment da las energias regenerablas ina part centrala da la strategia da l'interpresa. Repower modernisescha la forza idraulica grischuna cun grondas investiziuns. Uschia ha l'interpresa cumenzà il 2025 cun la sanaziun cumpletta da l'implant electric a Silvaplana. Già terminada è la renovaziun dals implants electric Campocologno e Papierfabrik sco era la renovaziun parziala da l'implant electric Claustra. Il mument vegn renovada a moda complessiva la tschiffada d'aua Miralago, che vegn surtut dabun als peschs che vivan en il Poschiavino ed en il Lago di Poschiavo. Suenter ch'ils implants fotovoltaics Madrisa Solar en il Partenz èn vegnids mess en funcziun parzialmain han quels cumenzà il settember a furnir cun success electricitad en la rait – sco emprima ovra solara alpina da la Svizra.

Cun integrar successivamain implants fotovoltaics, vehichels electric e pumpas da stgaur ed amplifitgar vinavant las raits d'electricitad digitalas (Smart Grids) crescha il basegn d'investir en las raits da distribuziun. Il 2025 ha Repower investì var 39 miu. francs en la rait da distribuziun grischuna. Las pli grondas investiziuns ha l'interpresa fatg per introducir il quintader intelligent Smart Meter sco era per modernisar ed amplifitgar diversas sutstaziuns.

Ina gronda valurisaziun regiunala

Betg il davos pervia da la gronda activitad d'investiziun ha Repower generà il 2025 ina valurisaziun regiunala considerabla. L'onn da gestiun ha Repower surdà ad interpresas grischunas incumbensas da lavur en la dimensiun da passa 30 miu. francs. Sur ils tschains d'aua, ulteriuras prestaziuns da concessiun e taglias èn 28,5 miu. francs ids directamain a las vischnancas ed al Chantun. La fin dal 2025 aveva Repower en tut 747 collavuraturas e collavuratur, da quels 466 engaschads en il Grischun. Las personas cun piazza da lavur en il Grischun han gudagnà il 2025 en total 53,5 miu. francs.

Il commerzi cuntanscha in fitg bun resultat

La partiziun da commerzi a Poschiavo ha cuntanschì il 2025 resultats excellents grazia a la fitg buna valitaziun dal svilup dals martgads. Sper la gestiun reussida da spreads tranter ils differents martgads contribuescha era l'optimaziun a curta vista dal parc d'implants electric essenzialmain al bun resultat en in ambient commercial volatil. L'ambient commercial è sa mussà sco pretensius, quai che stat en connex cun las quantitads d'aua sutproporzionalas, las numerusas uras cun pretschs fitg bass u schizunt negativs pervi da la ferma expansiun d'implants solars e pervi da fluctuaziuns sin il stgalim geopolitic. Repower quinta er en l'avegnir cun in'auta volatilitad als martgads e sa focussescha perquai sin ina gestiun disciplinada da las ristgas e sin analisis dal martgà per nizzegiar las schanzas en quest ambient.

Amplificaziun dals implants fotovoltaics en l'Italia

La strategia per amplifitgar las energias regenerablas en l'Italia è sin buna via. Repower Renewable ha cumenzà a construir trais implants fotovoltaics sin il terren. Tranter auter il parc solar agrivoltaic da 67 megawatt a Ciminna en Sicilia, che vegn collià cun la rait il 2026.

La vendita en l'Italia resta focussada consequentamain sin la creschientscha. Repower Italia ha lantschà ina campagna per extender l'organisaziun da vendita e la fatschenta cun la clientella gronda. En total ha l'interpresa furnì l'onn da gestiun a sia clientella finala var 4'285 uras gigawatt electricitad e stgars 327 miu. meters cubic gas. La clientella en Svizra è vegnida provedida da Repower cun 340 gigawatt forza electrica.

Persistenza

La grupp Repower ha rapportà dapi il 2021 mintg'onn tenor ils standards GRI davart sias activitads en favur da la persistenza. Ultra da quai lascha ella examinar dapi il 2024 externamain ina part da sias cifras distinctivas. Il rapport davart la persistenza mussa tranter auter nua che la grupp Repower stat en vista a sias finamiras climaticas e cun tge mesiras concretas ch'ella sa stenta da cuntanscher ellas.

Dividendas

Il cussegl d'administraziun propona a la radunanza generala dals 13 da matg 2026 ina dividenda da CHF 5,00 per aczia ed ina dividenda speziala da CHF 0,50.

Sguard en l'avegnir

Grazia al bun svilup da la fatschenta stat Repower sin in fundament finanziel solid. Questa fermezza dat a l'interpresa il spazi d'agir necessari per prender per mauns a moda prospectiva e consequenta las sfidas futuras. Ils proxims onns investescha ella vinavant sistematicamain en l'amplificaziun e la renovaziun dals implants da producziun ed en l'infrastructura da la rait. Uschia rinforza Repower a lunga vista sia cumpetitivitad e contribuescha essenzialmain ad in provediment d'energia durabel e persistent. Per il 2026 quinta Repower cun in bun resultat.

Cifras distintivas da la gruppa Repower

Resultat annual 2025

En miu. francs	2025	2024	2023	Midament 2024/2025
EBIT	133	175	371	-24 %
Gudogn da la gruppa	101	138	300	-27 %
Prestaziun totala	1'986	2'485	3'363	-20 %
Summa da bilantscha	2'084	2'235	2'642	-7 %
Agen chapital	1'230	1'181	1'141	+4 %
Quota d'agen chapital (pertschient)	59	53	43	+11 %
Investiziuns (materialas ed immaterialas)	142	79	102	+80 %
Fluss monetar da las activitads commerzialas ¹	221	200	381	+10 %
Persunal (dumber)	747	731	658	+2 %
Producziun d'electricitad incl. participaziuns e dretgs d'acquist (en uras gigawatt)	2'147	2'639	2'306	-19 %

1) Dividendas/tschains retschavids sco er tschains pajads vegnan declarads da nov en il fluss monetar da las activitads commercialas. Las cifras da l'onn precedent 2024 èn vegnidas adattadas correspondentamain.

Remartgas

- Infurmaziuns davart las finanzas ed il rapport da gestiun 2025 cumplet da Repower èn disponibels sin repower.com/investors. Sut repower.com/presentationen chatt'ins ils 8 d'avrigl a partir da ca. las 10.30 plinavant la preschentaziun davart il resultat annual 2025.
- Il rapport da gestiun cumpara en tudestg, talian ed englais en furma electronica. En cas d'interpretaziuns divergentas è decisiv il text tudestg.
- En quest text pon ins leger spetgas e supposiziuns davart eventuals svilups futurs. Quests parairis èn suttamess a malsegirezzas e ristgas. Il svilup effectiv po esser in auter che quel formulà qua.

Contacts

Stefan Bisculm
manader post da medias
m +41 79 372 77 76
stefan.bisculm@repower.com

Thomas Grond
manader communicaziun d'interpresa
m +41 79 814 77 72
thomas.grond@repower.com

Quai è Repower

L'interpresa Repower è dapi 120 onns activa sco producenta d'electricidad, manadra da la rait da distribuziun e commerzianta d'energia. Ses martgads-clav èn la Svizra e l'Italia. La sedia principala sa chatta a Poschiavo. Ulteriuras filialas ha ella a Bever, Glion, Grono, Küblis, Landquart, Turitg e Milaun. Repower è activa lung l'entira chadaina da valorisaziun da l'electricidad, da la producziun sur il commerzi fin a la distribuziun e la vendita, ed er en la fatschenta da gas. Repower è la pli gronda interpresa da provediment d'energia en il chantun Grischun, nua ch'ella posseda e gestiunescha pliras ovras idraulicas. En l'Italia è Repower ina da las pli grondas furnituras d'electricidad e da gas per interpresas. Il portfolio da l'interpresa en l'Italia cumpiglia plirs parcs da vent e parcs solars ed in'ovra electrica cumbinada cun gas. Mantegnair ed amplifitgar las energias regenerablas è ina part integrala da la strategia da Repower. Quai vala era per il svilup persistent da l'interpresa en ils secturs economia, societad ed ambient.